

■ COMMENTARI OSPITANT

In onn plain eveniments va a fin...

Ina retrospectiva da la presidenta da la regenza grischuna 2017

DA BARBARA JANOM STEINER,
PRESIDENTA DA LA REGENZA

Las lingias grossas èn stadas marcadas da temas sco «alternative facts» da l'elita da Trump, tests provocativs da rachetas dals Coreans dal nord, terror sin l'entir mund ed er en Europa, elecziuns dals parlaments en noss pajais vischins. In tema impurtant per tots: la digitalisaziun. Roboters, vehichels autoguidads, schanzas e ristgas per il mund da lavur èn vegnids discutads er tar nus en moda intensiva gia ditg avant che l'emprim Di digital svizzer saja vegni annunzià.

Qua tar nus, en noss chantun, è vegnida refusada cleramain ina contribuziun a la candidatura per ils Gieus olimpics. Il siemi da l'Olimpiada è pia spirà per in temp pli lung. Percunter è il svilup dal curs da l'euro, ch'è s'augmentà dal cumenzament d'avust da stgars 1.05 ad en il fratemp 1.17 francs, stà legraivel per il turissem e permetta pia da spetgar meglras cifras. Consternads avain nus stuì vesair ils 24 d'avust ch'ina gronda quantitat da gripa è sa distatgada dal Piz Cengalo en la Bregaglia ed è

ramplunada aval. Ina lavina da glitta d'ina dimensiun nunimagi- nablà è arrivada fin tar la via principal a Bondo ed ha cuvri parts dal vitg per meters. Las abitantas ed ils abitants dal vitg han pudì sa salvar a temp, otg viandants esters han pers la vita. Quest eveniment tragic ans ha puspè ina giada mussà quant vulnerabels che nus essan... ma er co che nossas forzas d'acziun funcziunan bain e prestan lavur eccellente e co che la solidaritad sa manifestescha en noss pajais – quai fa bain.

Sco presidenta da la regenza dastg jau er guardar enavos sin blers muments commovents e sin blers inscuters interessants. Uschia hai jau gi l'ocasiun da visitar tut las regions resp. lur conferenzas dals presidents per in barat d'ideas informal, suenter che la refurma dal territori è vegnida realisada cun success. Il facit è dal tuttafatg positiv. La refurma ha pudì vegnir realisada praticamain senza problems, grazia als responsabels al lieu – nossas indesch regions funcziunan ed èn prontas per dumagnar las sfidas futuras. Nossas refurmas da las structures cun uss er ina nova lescha da vischnancas e



cun ulteriurs projects da fusiun sco er cun lur finanziaziun grazia ad ina nova guliavaziun da finanzas èn sin buna via, e nossas finanzas chantunalas èn anc adina equilibradas e quai anc adina senza program da spargn, dentant cun ina disciplina rigurusa tar il budget. Sin plaun naziunal hai gi num da

defender ils interess da noss chantun en differentas conferenzas, particularmain en la conferenza da las regenzas chantunalas ed en la conferenza da las directuras e dals directurs chantunals da finanzas. Cun success ha pudì vegnir spustada ad interim la discussiun davart ils tschains d'aua. En connex cun temas zunt impurtants sco la guliavaziun da finanzas naziunala e la refurma fiscala SV 17 avain nus pudì far valair noss interess per entant cun success a la testa da differentas gruppas da lavur. La discussiun davart quests temas n'è betg anc terminada e vegn a cuntinuar cunzunt l'onn proxim cun stuair prender decisziuns impurtantas. En il decurs da l'onn avain nus pudì retschaiver bleras visitas uffizialas, uschia per exempel ambassaduras ed ambassadurs da l'Italia, da la Germania, da l'Austria, da la Finlanda, da la Svezia, da la Norvegia sco er da la China. Quests discurs èn elements impurtants da las relaziuns externas dal chantun. Talas visitas servan en emprima lingia a barattar experientschas sin il champ cultural, economic e politic. Er han gi lieu scuntradas cun las regenzas dal Principadi da Liechtenstein, dal Tirolo dal sid sco

er dal Vorarlberg, a chaschun da las qualas nus avain discutà dumondas specificas actualas e projects concrets transcunfinals. Adina puspè fascinanta è la diversitad incredibla d'occurrènzas distinguidas che vegnan purschidas en noss chantun. Il Forum economic mundial a Tavau, quest onn cun la visita impressiunanta dal president da stadi da la China Xi Jinping, il Maraton engiadinais u la Festa federala da lutga a Tavau, per numnar mo in pèr da las occurrènzas. Degns da vegnir menziunads ed in punct culminant absolut èn stads senza dubi ils Campiunadis mundials da skis a San Murezzan che han preschentà noss chantun sin plaun internaziunal en la meglra glisch. Impressiunanta è stada ina giada dapli la prestaziun eccellente da tut ils voluntaris. Senza quella na pudessan ins strusch realisar tals eveniments gronds. Lur motivaziun, lur engaschi e lur optimissem ans duessan esser in exempel per schliar cuminaivlamain las sfidas futuras.

En quest senn giavisch jau a Vos per l'onn nov tut il bun, cuntentientscha e bainstar, cunzunt buna sanadad!